

grátiam benígnus infúndis: hunc párvulum infirmum (vel hanc párvulam infirmam) a lecto ægritudinis erigere, et Ecclésiæ tuæ sanctæ, suisque paréntibus incólumem restituere dignéris; ut cunctis prolongátæ sibi vitæ diébus, grátia et sapiéntia coram te et homínibus proficiens, in justítia et sanctitáte tibi sérviat, et débitas misericórdiæ tuæ réferat gratiárum actiónes. Per Christum Dóminum nostrum. **R.** Amen.

**Orémus.**

**D**eus, qui miro órdine Angelórum ministéria, homínúmque dispénsas: concéde propítius; ut, a quibus tibi ministrántibus in cœlo semper assistitur, ab his in terra vita hujus púeri (vel puéllæ) muniátur. Per Christum Dóminum nostrum.

**R.** Amen.

*Completa Oratione ultima, Sacerdos imponat dexteram manum super caput infirmi, et dicat:*

Super ægros manus impónent, et bene habébunt. Jesus, Mariæ Fílius, mundi salus et Dóminus, méritis et intercessióne sanctórum Apostolórum suórum Petri et Pauli, et ómnium Sanctórum, sit tibi clemens et propítius. Amen.

*Quod sequitur Evángelium, pro temporis opportunitate et pro ægrotantis pueri parentum desiderio, Sacerdotis arbitrio dici poterit.*

**V.** Dóminus vobíscum.

**R.** Et cum spíritu tuo.

**Inítium sancti Evángelii secúndum Joánnem.**

**R.** Glória tibi, Dómine.

*Dum Sacerdos dicit Inítium etc. facit signum crucis de more super se in fronte, ore et pectore; similiter super puerum infirmum, si non potest se signare.*

**I**n princípío erat Verbum, et Verbum erat apud Deum, et Deus erat Verbum. Hoc erat in princípío apud Deum. Omnia per ipsum facta sunt: et

sine ipso factum est nihil, quod factum est: in ipso vita erat, et vita erat lux hóminum: et lux in ténebris lucet, et ténebræ eam non comprehendérunt. Fuit homo missus a Deo, cui nomen erat Joánnes. Hic venit in testimónium, ut testimónium perhiberet de lúmine, ut omnes créderent per illum. Non erat ille lux, sed ut testimónium perhiberet de lúmine. Erat lux vera, quæ illúminat omnem hóminem veniéntem in hunc mundum. In mundo erat, et mundus per ipsum factus est, et mundus eum non cognóvit. In própria venit, et sui eum non recepérunt. Quotquot autem recepérunt eum, dedit eis potestátem filios Dei fieri, his, qui credunt in nómine ejus: qui non ex sanguínibus, neque ex voluntáte carnis, neque ex voluntáte viri, sed ex Deo nati sunt. *(Hic genuflectitur.)* Et Verbum caro factum est, et habitávit in nobis: et vídimus glóriam ejus, glóriam quasi Unigéniti a Patre, plenum grátiae et veritátis.

**R.** Deo grátias.

*Postea benedicens puerum infirmum, subjungat dicens:*

**Benedictio Dei omnipoténtis, Patris, et Fílii, ✠ et Spíritus sancti, descéndat super te, et máneat semper. R.** Amen.

*Deinde adspergat eum aqua benedicta.*

*✠ Si fuerint plures infirmi in eodem cubiculo vel loco, Orationes et Benedictio prædictæ dicuntur super eos numero plurali.*

**Benedictio vestium et cinguli**

**quæ deferuntur in honorem beatæ Mariæ Virg.**

**Pro benedictione vestis.**

**V.** Adjutórium nostrum in nómine Dómini.

**R.** Qui fecit cœlum et terram.

**V.** Dóminus vobíscum. **R.** Et cum spíritu tuo.

## Orémus.

**B**éne ✠ dic, Dómine, vestem istam, in honórem et sub protectióne beatíssimæ Vírginis Mariæ suméndam: et præsta per invocatióem sancti tui nóminis; ut qui eam indúerit, córporis sanitátem, et ánimæ tutelam percípiat. Per Christum Dóminum nostrum. **R.** Amen.

*Deinde vestis adspargatur aqua benedicta.*

## Pro benedictione cinguli.

**V.** Adjutórium nostrum in nómine Dómini.

**R.** Qui fecit cœlum et terram.

**V.** Dóminus vobíscum. **R.** Et cum spírítu tuo.

## Orémus.

**D**eus, qui ut servum redímeres, Fílium tuum per manus impiórum ligári voluísti: béne ✠ dic, quæsumus, cingulum istud; et præsta, ut fámulus tuus, qui eo véluti sui córporis pœnitentiáli ligámine cingétur, vinculórum ejúsdem Dómini nostri Jesu Christi perpétuus exsístat amátor, túsque semper obséquiis se alligátum esse cognóscat. Per eúmdem Dóminum nostrum Jesum Christum Fílium tuum: Qui tecum vivit et regnat in unitáte Spírítus sancti Deus. **R.** Amen.

*Deinde cingulum adspargatur aqua benedicta.*

## Benedictio linteaminum pro infirmis.

**V.** Adjutórium nostrum in nómine Dómini.

**R.** Qui fecit cœlum et terram.

**V.** Dóminus vobíscum. **R.** Et cum spírítu tuo.

## Orémus.

**D**ómine Jesu Christe, qui per tactum fimbrium vestimentórum tuórum mulierem fluxu sanguinis laborántem, aliósque passim infirmos sanáre

dignátus es, et per sudária, et semicíntia Apóstoli tui Pauli languóres et spírítus nequam ab infirmis eádem virtúte fugásti: præsta, quæsumus; ut qui his vestiméntis, velis, et linteaminibus, quæ in tuo nómine bene ✠ dicimus, indúti vel opérti fúerint, sanitátem mentis et córporis percípere mereántur. Qui vivis et regnas in sœcula sœculórum.

**R.** Amen.

## Benedictio cujuscumque medicinæ.

**V.** Adjutórium nostrum in nómine Dómini.

**R.** Qui fecit cœlum et terram.

**V.** Dóminus vobíscum. **R.** Et cum spírítu tuo.

## Orémus.

**D**eus, qui mirábiliter hómínem creásti, et mirábilius reformásti, qui váriis infirmitátibus, quibus detinétur humána mortálitás, múltiplici remédio succúrrere dignátus es: propítius esto invocatióibus nostris, et sanctam tuam de cœlis benedictiónem super hanc medicinam infúnde; ut ille, qui eam sumpserit (*vel* hi, qui eam sumpserint), sanitátem mentis et córporis percípere mereatur (*vel* mereántur). Per Christum Dóminum nostrum. **R.** Amen.

*Et mox adspargat medicinam aqua benedicta.*

## Benedictio panis et placentarum.

**D**ómine Jesu Christe, panis Angelórum, panis vivus, et æternæ vitæ: bene ✠ dicere dignáre panem istum, sicut benedixísti quinque panes in desérto; ut omnes ex eo digne gustántes, inde córporis et ánimæ desiderábilem percípiant sanitátem. Per Christum Dóminum nostrum. **R.** Amen.

**Benedictio cerevisiæ.**

**B**enedic ✠ Dómine creatúram istam cerevisiæ, quam ex ádipe fruménti producere dignátus es: ut sit remédium salutáre humano géneri; et præsta per invocatióem nóminis tui sancti, ut quicumque ex ea bíberint, sanitátem córporis, et animæ tutelam percípiant. Per Christum Dóminum nostrum. **R.** Amen.

**Benedictio casei et butyri.**

**D**ignáre, Dómine Deus omnípotens, benedicere, et sancti ✠ ficáre hanc creatúram casei et butýri, quam ex ádipe animálium producere dignátus es: ut quicumque ex pópulis tuis fidélibus de eis coméderint, omni benedictióe cœlésti, et grátia tua saturáti, repleántur in bonis. Per Christum Dóminum nostrum. **R.** Amen.

**Benedictio laridi.**

**B**éne ✠ dic, Dómine, creatúram istam laridi, ut sit remédium salutáre géneri humano: et præsta per invocatióem tui sancti nóminis; ut quicumque ex eo sumpserint, córporis sanitátem et animæ tutelam percípiant. Per Christum Dóminum nostrum. **R.** Amen.

**Benedictio volucrum.**

**D**eus, univérsæ cónditor natúrae, qui inter céteras diversárum creaturárum spécies, pro humano géneris usu étiam volatílium genus ex aqua producere dignátus es; de quibus Noë ex arca egrédiens holocaustum tibi plácitum obtulit;

et qui pópulo tuo ex Ægýpto edúcto per Móysen servum tuum, munda ab immúndis ségregans, ut de iis éderent, præcéptum dedísti: te súpplices rogámus, ut has mundárum ávium carnes benedicere, et sancti ✠ ficáre dignéris; ut quicumque ex iis coméderint, benedictióis tuæ abundántia repleántur, et ad æternæ vitæ páscua pervenire mereántur. Per Christum Dóminum nostrum.

**R.** Amen.

**Benedictio apum.**

**V.** Adjutórium nostrum in nómine Dómini.

**R.** Qui fecit cœlum et terram.

**V.** Dóminus vobíscum.

**R.** Et cum spíritu tuo.

**Orémus.**

**D**ómine Deus omnípotens, qui creásti cœlum et terram, et ómnia animália super ea et in eis existéntia, ut eis uteréntur hómines; quique jussísti per ministros sacrosáctæ Ecclésiæ cœreos ex opéribus apum edúctos in templo, dum sacrum perágitur ministérium, in quo conficitur et súmitur sacrosáctum corpus et sanguis Jesu Christi Fílii tui, accéndi: descéndat tua sancta benedicció super has apes et hæc alveária; ut múltiplicent, fructíficent et conservéntur ab ómnibus malis, ita ut fructus ex eis proveniéntes ad laudem tuam, Fílii et Spíritus sancti, beatissimæque Vírginis Mariæ dispenséntur. Per Christum Dóminum nostrum. **R.** Amen.

*Et alvearia adspergantur aqua benedicta.*

**Benedictio pecorum et jumentorum.**

*V.* Adjutorium nostrum in nomine Domini.  
*R.* Qui fecit caelum et terram.  
*V.* Dominus vobiscum. *R.* Et cum spiritu tuo.

*Orémus.*

**D**omine Deus, rex caeli et terrae, Verbum Patris, per quod omnia facta sustentationi nostrae tradita sunt, respice quaesumus humilitatem nostram: et sicut nostris laboribus et necessitatibus subventionem tribuisti, ita tua benignissima miseratione, ac caelesti benedictione, haec pecora et armenta (hoc pecus et armementum) bene ✠ dicere, tueri, et custodire, ac famulis tuis cum temporali proventu gratiam perpetuam largiri digneris; ut cum gratiarum actione nomen sanctum tuum laudetur et glorificetur. Qui vivis et regnas cum Deo Patre in unitate Spiritus sancti Deus, per omnia saecula saeculorum. *R.* Amen.

In nomine Pa ✠ tris, et Fi ✠ lii, et Spiritus ✠ sancti. *R.* Amen.

**Benedictio equorum et animalium.**

*V.* Adjutorium nostrum in nomine Domini.  
*R.* Qui fecit caelum et terram.  
*V.* Domine, exaudi orationem meam.  
*R.* Et clamor meus ad te veniat.  
*V.* Dominus vobiscum. *R.* Et cum spiritu tuo.

*Orémus.*

**D**eus, refugium nostrum, et virtus: adesto piis Ecclesiae tuae precibus, auctor ipse pietatis, et praesta; ut quod fideliter petimus, efficaciter consequamur. Per Christum Dominum nostrum.  
*R.* Amen.

*Orémus.*

**O**mnipotens sempiternus Deus, qui gloriosum beatum Antonium, variis tentationibus probatum, inter mundi hujus turbines illaesus abire fecisti: concede famulis tuis; ut et praclaro ipsius proficiamus exemplo, et a praesentis vitae periculis ejus meritis et intercessionem liberemur. Per Christum Dominum nostrum. *R.* Amen.

*Orémus.*

**B**ene ✠ dictionem tuam, Domine, haec animalia accipiant: qua corpore salventur, et ab omni malo per intercessionem beati Antonii liberentur. Per Christum Dominum nostrum. *R.* Amen.

*Deinde adspergantur aqua benedicta.*

**Benedictio animalium****peste vel alio morbo laborantium.**

*Sacerdos superpelliceo et stola violacea indutus, dicat:*

*V.* Adjutorium nostrum in nomine Domini.  
*R.* Qui fecit caelum et terram.  
*V.* Domine, non secundum peccata nostra facias nobis.  
*R.* Neque secundum iniquitates nostras retribuas nobis.  
*V.* Homines et jumenta salvabis, Domine.  
*R.* Quemadmodum multiplicasti misericordiam tuam, Deus.  
*V.* Aperis tu manum tuam.  
*R.* Et imple omne animal benedictione.  
*V.* Domine, exaudi orationem meam.  
*R.* Et clamor meus ad te veniat.  
*V.* Dominus vobiscum.  
*R.* Et cum spiritu tuo.

Orémus.

**D**eus, qui labóribus hóminum étiam de mutis animalibus solátia subrogásti: súpplīces te rogámus; ut sine quibus non álitur humána conditio, nostris fácias úsibus non períre. Per Christum Dóminum nostrum. **R.** Amen.

Orémus.

**M**isericórdiam tuam, Dómine, súpplīces exorámus: ut hæc animália, quæ gravi infirmitate vexántur, in nómine tuo atque bene ✠ dictionis virtúte sanéntur. Exstinguátur in eis omnis diabólica potéstas, nec ultérior ægrótent. Tu eis, Dómine, sis defénsor vitæ, remédium sanitátis. Per Dóminum nostrum Jesum Christum Fílium tuum: Qui tecum vivit et regnat etc. **R.** Amen.

Orémus.

**A**vérte, quæsumus Dómine, a fidélibus tuis cuncta propítius flagélla: et morbórum in animália sæviéntium depélle perníciam; ut quos mérito plectis dévios, fóveas tua miseratióne corréctos. Per Christum Dóminum nostrum. **R.** Amen.

Et adspergat aqua benedicta.

**Benedictio pecorum et jumentorum  
gravi infirmitate vexatorum.**

**V.** Adjutórium nostrum in nómine Dómini.  
**R.** Qui fecit cœlum et terram.  
**V.** Dóminus vobíscum. **R.** Et cum spírītu tuo.

Orémus.

**M**isericórdiam tuam, Dómine, súpplīces exorámus: ut hæc animália quæ gravi infirmitate vexántur, in nómine tuo, atque tuæ bene ✠ dictionis virtúte sanéntur. Exstinguátur in eis omnis

diabólica potéstas; et ne ultérior ægrótent, tu eis Dómine, sis defénsio vitæ, et remédium sanitátis. Per Dóminum nostrum Jesum Christum Fílium tuum: Qui tecum vivit et regnat in unitate Spírītus sancti Deus, per ómnia sæcula sæculórum.

**R.** Amen.

**Benedictio salis vel avenæ  
pro animalibus.**

**V.** Adjutórium nostrum in nómine Dómini.  
**R.** Qui fecit cœlum et terram.  
**V.** Dóminus vobíscum.  
**R.** Et cum spírītu tuo.

Orémus.

**D**ómine Deus, ómnium cónditor et conservátor, cujus in manu est ánima omnis vivéntis, et spírītus univérsæ carnis: exaúdi, quæsumus, tuórum fidélibus preces, et hanc creatúram salis (vel avenæ) tua bene ✠ dictione, tuæque invisíbilis operatiónis virtúte perfúnde; ut animália quæ necessitatibus humanis tribúere dignátus es, cum ex eo (vel ex ea) gustáverint, ab omni morbo illæsa reddántur, et a maligni spírītus incúrsu, te protegente, custodiántur. Per Christum Dóminum nostrum. **R.** Amen.

Adspergat sal vel avenam aqua benedicta.

**Benedictio stabuli  
equorum, boum et aliorum armentorum.**

**V.** Adjutórium nostrum in nómine Dómini.  
**R.** Qui fecit cœlum et terram.  
**V.** Dóminus vobíscum.  
**R.** Et cum spírītu tuo.

## Orémus.

**D**ómine Deus omnípotens, qui Fílium tuum unigénitum, Redemptórem nostrum, in stábulo nasci, et inter duo animália in præsepío reclinári voluísti: béne ✠ dic, quæsumus, hoc stábulum, et defénde illud ab omni nequítia vel versútia diabólicæ fraudis; ut juméntis, pecóribus, ceterisque animántibus efficiátur locus sanus, et ab omni impugnatione secúrus. Et quóniam cognóvit bos possessórem suum, et ásinus præsepe dómini sui: misericórditer tríbue fámulis tuis, quos ad imáginem tuam creásti, paulo minus ab Angelis minuísti, et sub quorum pédibus subjecísti oves et boves univérsas, însuper et pécora campi; ne comparéntur juméntis insipiéntibus, et ne fiant sicut equus et mulus, quibus non est intelléctus; sed te solum Deum auctórem bonórum ómnium agnóscant, et in servítio tuo fidéles perseverént, quátenus de percéptis munéribus tibi grátias exhibéntes, beneficia potióra percípere mereántur. Per eúndem Christum Dóminum nostrum. **R.** Amen.

Deinde, si tunc in stabulo congregata fuerint animalia, addere poterit Sacerdos sequentes Orationes: Omnípotens sempitérne Deus, qui gloriósum etc. et Benedictiónem tuam etc. uti supra in Benedictiōe equorum et animalium. pag. 69\*

Postea adspargat aqua benedicta stabulum et animalia.

## Benedictio ad omnia.

**H**æc benedictionis formula adhiberi potest a quovis Sacerdote pro omnibus rebus, de quibus specialis benedictio non habetur in Rituali Romano.

**V.** Adjutórium nostrum in nómine Dómini.  
**R.** Qui fecit cœlum et terram.  
**V.** Dóminus vobíscum.  
**R.** Et cum spírítu tuo.

## Orémus.

**D**eus, cujus verbo sanctificántur ómnia, benedictiónem tuam effúnde super creatúram istam (**vel** creatúras istas): et præsta, ut quisquis ea (**vel** eis) secúndum legem et voluntátem tuam cum gratiárum actiōne usus fúerit, per invocatiōnem sanctíssimi Nóminis tui, córporis sanitátem, et ánimæ tutelam, te auctóre, percípiat. Per Christum Dóminum nostrum. **R.** Amen.

Deinde illam (vel illas) Sacerdos adspargit aqua benedicta.

## BENEDICTIONES RESERVATÆ

AB EPISCOPO VEL SACERDOTIBUS FACULTATEM  
 HABENTIBUS FACIENDÆ.

## Benedictio solemnior novæ crucis.

**N**ova crux, seu tabula, in qua Crucifixus est depictus, hoc modo benedicitur. Paratis thure, thuribuloque cum igne, aqua benedicta, Sacerdos delegatus superpelliceo, stola, et pluviali rubri coloris indutus, stans dicit:

**V.** Adjutórium nostrum in nómine Dómini.  
**R.** Qui fecit cœlum et terram.  
**V.** Dóminus vobíscum.  
**R.** Et cum spírítu tuo.

## Orémus.

**B**éne ✠ dic, Dómine Jesu Christe, hanc crucem tuam, per quam eripuísti mundum a potestáte diabóli, et superásti passióne tua suggestórem peccáti, qui gaudébat in prævaricatiōne primi hóminis per ligni vétiti sumptiōnem. Qui cum Deo Patre et Spírítu sancto vivis et regnas in sœcula sœculórum. **R.** Amen.